

A C T A 10/2019

SESIÓN EXTRAORDINARIA PLENO MUNICIPAL

- 8 DE XULLO DE 2019 -

Na Casa do Concello, a oito de xullo de dous mil dezanove, reúnense en primeira convocatoria os/as señores/as concelleiros/as que se relacionan a continuación, baixo a presidencia do sr. alcalde, D. Rafael C. Sisto Edreira, co obxecto de celebrar, de conformidade co previsto no artigo 38 do R.D. 2568/1986, de 28 de novembro, a sesión extraordinaria do Pleno municipal correspondente ao día da data, para a que foron debidamente convocados/as.

ASISTENTES:

Alcalde:

D. Rafael Carlos Sisto Edreira

Concelleiros/as:

D.^a Iria Otero Romero
D. Xosé Ignacio Iglesias Villar
D.^a María López Álvarez
D. José Manuel Guerra Calvelo
D. Antonio Reyes Sánchez Crespo
D.^a María Vázquez Rey
D.^a María Dolores Nariño Facal
D.^a María Teresa Castro Framil
D.^a Lucía Calvo de la Uz
D.^a Margarita Rosende Domínguez
D.^a Uxía Lemus de la Iglesia
D. Roberto Moñino Gil
D.^a María Josefa Argibay da Silva
D. José Manuel Elías Noya
D. Manuel Anxo Fernández Baz
D.^a Carmen Diéguez González

Secretaría xeral:

D.^a Virginia Fraga Díaz

ORDE DO DÍA:

- 1.- DAR CONTA DA RESOLUCIÓN DA ALCALDÍA DE NOMEAMENTO DE MEMBROS E DELEGACIÓNS NA XUNTA DE GOBERNO LOCAL**
- 2.- DAR CONTA DA RESOLUCIÓN DA ALCALDÍA DE NOMEAMENTO DE TENENTE DE ALCALDE**
- 3.- DAR CONTA DA RESOLUCIÓN DA ALCALDÍA DE DELEGACIÓNS NOS/AS CONCELLEIROS/AS**
- 4.- DACIÓN DE CONTA DA CONSTITUCIÓN DE GRUPOS POLÍTICOS MUNICIPAIS E PORTAVOCES**
- 5.- PROPOSTA DA ALCALDÍA SOBRE A PERIODICIDADE DAS SESIÓNS DO PLENO E DA XUNTA DE GOBERNO LOCAL**
- 6.- PROPOSTA DA ALCALDÍA DE CREACIÓN E COMPOSICIÓN DAS COMISIÓNS INFORMATIVAS E XUNTA DE PORTAVOCES**
- 7.- PROPOSTA DA ALCALDÍA SOBRE DEDICACIÓNS EXCLUSIVAS E PARCIAL**
- 8.- PROPOSTA DA ALCALDÍA SOBRE PERSOAL EVENTUAL**
- 9.- PROPOSTA DA ALCALDÍA SOBRE RÉXIME ECONÓMICO DAS ASISTENCIAS E INDEMNIZACIONES**
- 10.- PROPOSTA ALCALDÍA DE ASIGNACIÓNS A GRUPOS POLÍTICOS**

Co quórum establecido polas disposicións legais vixentes para a válida constitución do Pleno, o sr. alcalde, sendo as vinte horas, declara público e aberto o acto, pasando a tratar os asuntos incluídos na orde do día que figura na convocatoria, que son os seguintes:

- 1.- DAR CONTA DA RESOLUCIÓN DA ALCALDÍA DE NOMEAMENTO DE MEMBROS E DELEGACIÓNS NA XUNTA DE GOBERNO LOCAL.**

O sr. alcalde da conta da Resolución de nomeamento de membros e delegacións na Xunta de Goberno Local, de 3 de xullo de 2019 (res. 522/19), corrixida mediante Resolución de 3 de xullo de 2019 (res. 526/19), que se recollen a continuación.

“RESOLUCIÓN DA ALCALDÍA

Unha vez celebradas as eleccións locais o pasado día 26 de maio, e constituído o novo Concello, o 15 de xuño, resulta necesario proceder ao establecemento da organización municipal, en particular, á constitución da Xunta de Goberno Local, no exercicio da potestade de autoorganización que o artigo 4.1.a) da Lei 7/1985, de 2 de abril, reguladora das bases do réxime local (LRBRL), recoñece a esta Entidade.

De conformidade co disposto nos artigos 4 e 9 do Regulamento orgánico municipal (ROM), artigos 20.1.b) e 23 da citada Lei, en concordancia coas previsións da lexislación autonómica de réxime local contidas na Lei 5/97, de 22 de xullo, de Administración Local de Galicia, e demais lexislación complementaria, neste Municipio é obrigatoria a constitución da Xunta de Goberno Local por ter unha poboación superior a 5.000 habitantes, e estará integrada polo alcalde e un número de concelleiros non superior ao terzo do número legal dos que compoñen a Corporación.

Considerando que de conformidade co disposto nos artigos 5.3, 6, 7 e 10 do ROM, artigos 21.3 e 23.2.b) da LRBRL, artigos 43 e 44 do R.D 2568/1986, de 28 de novembro, polo que se aproba o Regulamento de organización, funcionamento e Réxime Xurídico das Entidades Locais, en concordancia coas previsións da lexislación autonómica de réxime local contidas na Lei 5/97, de 22 de xullo, de Administración Local de Galicia, o alcalde pode delegar o exercicio das súas atribucións coas limitacións establecidas nos artigos citados.

En virtude do exposto e no uso das atribucións que me confire a lexislación vixente,

RESOLVO:

Primeiro. Constituír a Xunta de Goberno Local do Concello de Teo, que estará integrada por este alcalde e cinco concelleiros/as.

Segundo.- Nomear como membros da Xunta de Goberno Local os/as seguintes concelleiros/as:

DONA IRIA OTERO CEPEDA

DONA MARÍA LÓPEZ ÁLVAREZ
DONA UXÍA LEMUS DE LA IGLESIA
DON ROBERTO MOÑINO GIL
DONA M^a JOSEFA ARGIBAY DA SILVA

Terceiro.- Delegar na Xunta de Goberno Local, as seguintes atribucións da alcaldía:

1.- Os contratos de obras, de subministro, de servizos, os contratos de concesión de obras, os contratos de concesión de servizos e os contratos administrativos especiais cando o seu valor estimado non supere o 10 por cen dos recursos ordinarios do orzamento nin, en calquera caso, a contía de seis millóns de euros, incluídos os de carácter plurianual cando a súa duración non sexa superior a catro anos, eventuais prórrogas incluídas sempre que o importe acumulado de todas as súas anualidades non supere nin a porcentaxe indicada, referida aos recursos ordinarios do orzamento do primeiro exercicio, nin a contía sinalada, reservándose o alcalde a facultade de contratar cando nas mesmas condicións o valor estimado non supere os 200.000 euros.

2.- Os contratos privados e a adxudicación de concesións sobre os bens da Entidade local cando o orzamento base de licitación non supere o 10 por cen dos recursos ordinarios do orzamento nin o importe de tres millóns de euros, reservándose o alcalde a facultade para adxudicar cando nas mesmas condicións o citado orzamento non supere os 200.000 euros.

3.- A aprobación dos proxectos de obras e servizos candos sexa competente para a súa contratación e estean previstos nos orzamentos.

4.- A concesión de licenzas, salvo que as leis sectoriais llas atribúan expresamente ao Pleno, reservándose o alcalde a competencia para o outorgamento das licenzas de utilización das vías públicas mediante a entrada de vehículos a través de beirarrúas e por reserva da vía pública para aparcadoiro exclusivo, carga e descarga de mercadorías de calquera clase.

5.- A concesión de subvencións en réxime de concorrencia competitiva e distribución de cantidades con cargo ás partidas que figuren no orzamento.

Cuarto.- A Xunta de Goberno Local celebrará sesión constitutiva o vindeiro xoves 11 de xullo, ás trece horas, de acordo co disposto no artigo 112 do ROF.

A periodicidade das súas sesións ordinarias, de acordo co establecido no artigo 11.1 do Regulamento orgánico municipal, será o primeiro e terceiro luns da cada mes ás 14 horas, (ás 13 cando exista horario reducido), e extraordinaria e urxente cando sexan convocadas polo alcalde ou a instancia de polo menos unha cuarta parte do número legal dos seus compoñentes.

A estes efectos entenderase que a referencia ao primeiro e terceiro luns, deben ser hábiles, se o luns cadrase festivo, trasladándose ao seguinte día hábil.

Quinto.- O presente Decreto terá efecto dende o día da súa data, sen prexuízo da súa preceptiva publicación no Boletín Oficial da Provincia, na web municipal e no taboleiro de edictos da Corporación, debéndose notificar aos membros da Xunta de Goberno Local aos efectos do previsto no artigo 114 do ROF.

Sexto.- Da presente resolución darase conta ao Pleno na sesión extraordinaria que se convoque para dar cumprimento ao previsto no art. 38 do Regulamento de organización, funcionamento e réxime xurídico das Entidades Locais.”

“RESOLUCIÓN DA ALCALDÍA

Por Resolución da alcaldía do 3 de xullo de 2019 (res 522/2019), resolveuse constituír a Xunta de Goberno Local, e procedeuse ao nomeamento dos/as concelleiros/as que a integran.

Detectado erro material na transcripción do segundo apelido dunha das concelleiras integrantes da Xunta de Goberno Local, é preciso corrixilo.

En virtude do exposto, e no uso das atribucións que me confire a lexislación vixente,

RESOLVO:

Primeiro.- Corrixir o erro material detectado, e, onde di “IRIA OTERO CEPEDA”, debe dicir “IRIA OTERO ROMERO”.

Segundo.- Notificar a presente Resolución aos membros da Xunta de Goberno Local, para o seu coñecemento e efectos oportunos.

Terceiro.- Da presente resolución darase conta ao Pleno na sesión extraordinaria que se convoque para dar cumprimento ao previsto no art. 38 do Regulamento de organización, funcionamento e réxime xurídico das Entidades Locais.”.

2.- DAR CONTA DA RESOLUCIÓN DA ALCALDÍA DE NOMEAMENTO DE TENENTE DE ALCALDE.

O sr. alcalde da conta da Resolución de nomeamento de Tenente de Alcalde, de 3 de xullo de 2019 (res. 523/19), que se recolle a continuación.

“RESOLUCIÓN DA ALCALDÍA

Unha vez celebradas as eleccións locais o pasado día 26 de maio, e constituído o novo concello, o día 15 de xuño, resulta necesario proceder ao establecemento da organización municipal, en particular polo que se refire á designación dos Tenentes de Alcalde.

Considerando que de conformidade co disposto nos artigos 4 e 8 do Regulamento orgánico municipal (ROM), artigos 20.1.a), 21 e 23 da Lei 7/1985, de 2 de abril, Reguladora das Bases do Réxime Local (LRBRL), artigo 46 do R. D. 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais (ROF), en concordancia coas previsións da lexislación autonómica de réxime local contidas na Lei 5/97, de 22 de xullo, de Administración Local de Galicia, o nomeamento dos Tenentes de Alcalde é competencia desta alcaldía.

Considerando que, de acordo co artigos 8 ROM, 23 LRBRL e 46 do ROF, o nomeamento dos Tenentes de Alcalde debe facerse entre os membros da Xunta de Goberno Local e visto o Decreto de 03/07/2019 (res 522/2019), onde se nomean os membros da Xunta de Goberno Local.

En virtude do exposto e en uso das atribucións que me confire a normativa citada,

RESOLVO:

Primeiro.- Nomear como Primeira Tenente de Alcalde a Dona Uxía Lemus de la Iglesia, membro da Xunta de Goberno Local.

Segundo.- Corresponde á Primeira Tenente de Alcalde, en canto tal, substituír na totalidade das súas funcións ao alcalde, nos casos de vacante, ausencia, enfermidade ou impedimento que imposibilite a este para o exercicio das súas atribucións.

Terceiro.- Notificar este Decreto á Primeira Tenente de Alcalde nomeada, facéndolle constar que terá que manter informada á alcaldía do exercicio das súas atribucións como Alcaldesa accidental, non podendo no citado exercicio, nin modificar as delegacións xa efectuadas pola alcaldía con anterioridade, nin outorgar outras novas.

Cuarto.- Da presente resolución darase conta ao Pleno do Concello na sesión extraordinaria que se convoque en cumprimento do previsto polo artigo 38 do ROF, notificándose, ademais, persoalmente á nomeada, e publicarase no Boletín Oficial da Provincia, no taboleiro de edictos e na web municipal, ser prexuízo da súa efectividade dende o día seguinte ao da presente resolución.”.

3.- DAR CONTA DA RESOLUCIÓN DA ALCALDÍA DE DELEGACIÓNS NOS/AS CONCELEIROS/AS.

O sr. alcalde da conta da Resolución de delegación nos/as concelleiros/as, de 3 de xullo de 2019 (res. 524/19), que se recolle a continuación.

“RESOLUCIÓN DA ALCALDÍA

Visto o réxime xurídico das delegacións que o alcalde pode realizar en favor dos concelleiros/as, de acordo co establecido nos artigos 6, 7 e 16 do Regulamento orgánico municipal (ROM), artigos 44 e ss do Regulamento de Organización Funcionamento e Réxime Xurídico das Entidades Locais (ROF), en concordancia coas previsións da lexislación autonómica de réxime local contidas na Lei 5/97, de 22 de xullo, de Administración Local de Galicia, e demais lexislación complementaria.

En virtude do exposto e no uso das atribucións conferidas polo normativa aplicable,

RESOLVO:

Primeiro.- Delegar nos/as concelleiros/as que se relacionan a continuación, as atribucións que igualmente se indican, sen facultades resolutorias, agás nos casos en que así se indique:

1.- D.^a UXIA LEMUS DE LA IGLESIA, 1^a Tenente de alcalde, concelleira delegada de Urbanismo, Seguridade cidadá, Enerxía e Sostibilidade, coa facultade de dirixir e xestionar os seguintes servizos:

Urbanismo

PXOM, desenvolvemento e xestión
Disciplina urbanística
Obras de urbanización, e rede de cable e gas
Vivenda

Seguridade cidadá

Policía Local
Protección civil

Xestión enerxética e alumeado público

Sostibilidade

Sendas peonís e ciclistas (en colaboración coa concelleira da área de mobilidade)

En xeral, as súas funcións serán todas as relacionadas coa área ou materia que se delegue, sen incluír a facultade de resolver mediante actos administrativos que afecten a terceiros, agás na área de urbanismo, que si incluírá dita facultade, respectando en todo caso as limitacións recollida no artigo 21.1 j) e 21.3 da LRBRL e demais previstas na normativa aplicable, en relación coas atribucións non susceptibles de delegación, e incluíndo a resolución dos recursos de reposición contra os actos ditados no exercicio das atribucións delegadas.

2.- D.^a IRIA OTERO ROMERO, concelleira delegada de Mobilidade, Comercio, Turismo, Emprego e Igualdade, coa facultade de dirixir e xestionar en xeral os seguintes servizos:

Mobilidade

Transporte

Teobús

Camiños escolares

Sendas peonís e ciclistas (en colaboración coa concelleira de urbanismo)

Comercio e Turismo

Axencia de desenvolvemento Local

Emprego

Información e orientación laboral

Xestión ETC de Solláns

Obradoiros de emprego

Igualdade

CIM

Prevención da violencia de xénero

Promoción da diversidade

En xeral, as súas funcións serán todas as relacionadas coa área ou materia que se delegue, sen incluír a facultade de resolver mediante actos administrativos que afecten a terceiros.

3.- D. ROBERTO MOÑINO GIL, concelleiro delegado de Infraestruturas, coa facultade de dirixir e xestionar en xeral os seguintes servizos:

Infraestruturas

Plans provinciais de infraestruturas

Plans especiais

En xeral, as súas funcións serán todas as relacionadas coa área ou materia que se delegue, sen incluír a facultade de resolver mediante actos administrativos que afecten a terceiros.

4.- D. XOSE IGNACIO IGLESIAS VILLAR, servizos de Benestar, Persoal e Deportes, coa facultade de dirixir e xestionar os seguintes servizos:

Benestar

Servizos Sociais

Escolas Infantís 0-3 anos

Atención aos maiores

Conciliación

Voluntariado

Políticas de inclusión social

Persoal

Xestión de persoal

RPT

Convenio colectivo

Deportes

Instalacións deportivas

Escolas deportivas municipais

Espectáculos e eventos deportivos

En xeral, as súas funcións serán todas as relacionadas coa área ou materia que se delegue, sen incluír a facultade de resolver mediante actos administrativos que afecten a terceiros.

5.- D.^a M.^a JOSEFA ARGIBAY DA SILVA, concelleira delegada de Educación, Cultura, Administración e Participación veciñal, coa facultade de dirixir e xestionar en xeral os seguintes servizos:

Educación

- Mantemento de edificios escolares
- Relación coas ANPAS e Comunidade educativa
- CRA
- Consello escolar municipal
- Actividades extraescolares e formación de adultos

Cultura

- Infraestruturas culturais e programación
- Patrimonio cultural
- Fomento da lectura
- Memoria histórica
- Apoio ás asociacións culturais

Participación veciñal

- Relacións veciñais e participación
- Casas Comúns
- Consellos parroquiais

Administración

- Administración electrónica
- Contratación
- Seguros
- Comunicacións
- Organización da páxina WEB municipal

En xeral, as súas funcións serán todas as relacionadas coa área ou materia que se delegue, sen incluír a facultade de resolver mediante actos administrativos que afecten a terceiros.

6.- D.^a MARÍA LÓPEZ ÁLVAREZ, concelleira delegada de Lingua e Mocidade, coa facultade de dirixir e xestionar en xeral os seguintes servizos:



Lingua

- Aplicación da ordenanza de normalización
- Promoción do galego na administración
- Promoción social do idioma

Mocidade

- Campamentos
- Campañas específicas

En xeral, as súas funcións serán todas as relacionadas coa área ou materia que se delegue, sen incluír a facultade de resolver mediante actos administrativos que afecten a terceiros.

7.- D. JOSÉ MANUEL ELÍAS NOYA, Servizos básicos, coa facultade de dirixir e xestionar en xeral os seguintes servizos:

Servizos básicos

- Reparación de vías e camiños
- Parques e Xardíns
- Áreas de xogo infantil
- Rozas e xestión de augas pluviais
- Xestión das cuadrillas municipais de obras e parques

En xeral, as súas funcións serán todas as relacionadas coa área ou materia que se delegue, sen incluír a facultade de resolver mediante actos administrativos que afecten a terceiros.

Segundo.- A alcaldía, en calquera momento, poderá asumir as atribucións delegadas na presente Resolución sen prexuízo da súa avocación conforme á lexislación de procedemento administrativo común.

Terceiro.- Da presente Resolución darase conta ao Pleno na sesión extraordinaria que se convoque para dar cumprimento ao artigo 38 do Regulamento de organización, funcionamento e réxime xurídico da Entidades Locais, notificándose, ademais,

persoalmente aos designados, aos efectos do artigo 114 do ROF que esixe, para á eficacia da delegación, a súa aceptación por parte do delegado, entendéndose tacitamente aceptada se no termo de tres días hábiles non fai manifestación expresa ante o órgano delegante de que non acepta a delegación.

Cuarto.- Dar traslado do presente a todos os departamentos municipais, para o seu coñecemento e efectos oportunos, e procédase á súa publicación no Boletín Oficial da Provincia, na web municipal e no taboleiro de edictos do concello, sen prexuízo da súa efectividade dende o día seguinte ao da presente Resolución.”.

4.- DACIÓN DE CONTA DA CONSTITUCIÓN DE GRUPOS POLÍTICOS MUNICIPAIS E PORTAVOCES.

O sr. alcalde da conta da constitución dos grupos políticos municipais, segundo o documento incorporado ao expediente, de 3 de xullo de 2019, que se recolle a continuación.

“ASUNTO: DACIÓN DE CONTA DA CONSTITUCIÓN DE GRUPOS POLÍTICOS MUNICIPAIS E PORTAVOCES

De acordo co previsto no artigo 73.3 Lei 7/1985, de 2 de abril, reguladora das bases do réxime local, artigos 38 e ss do Regulamento orgánico municipal (ROM), artigos 74 e ss. da Lei 5/1997, de 22 de xullo, de Administración Local de Galicia, e artigos 23 e ss. do R.D. 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais, constituíronse os grupos políticos que se detallan a continuación, mediante escrito dirixido ao Presidente e subscrito por todos os seus integrantes, coa designación dos correspondentes portavoces e, no seu caso, suplentes.

1.- PARTIDO POPULAR (rex. entrada nº 4306 do 21/06/2019)

- D. José Manuel Guerra Calvelo
- D. Antonio Reyes Sánchez Crespo
- D.^a María Vázquez Rey
- D.^a María Dolores Nariño Facal
- D.^a María Teresa Castro Framil

D.^a Lucía Calvo de la Uz

D.^a Margarita Rosende Domínguez

Portavoz:

D. José Manuel Guerra Calvelo

Suplente:

D. Antonio Reyes Sánchez Crespo

2.- SON DE TEO (rex. entrada nº 4308 do 21/06/2019)

D. Rafael Carlos Sisto Edreira

D.^a Iria Otero Romero

D. Xosé Ignacio Iglesias Villar

D.^a María López Álvarez

Portavoz:

D.^a Iria Otero Romero

Suplente:

D. Xosé Ignacio Iglesias Villar

3.- PSdeG-PSOE (rex. entrada nº 4309 do 21/06/2019)

D.^a Uxía Lemus de la Iglesia

D. Roberto Moñino Gil

D.^a María Josefa Argibay Silva

D. José Manuel Elías Noya

Portavoz:

D.^a Uxía Lemus de la Iglesia

Suplente:

D. Roberto Moñino Gil

4.- BLOQUE NACIONALISTA GALEGO (rex. entrada nº 4256 do 20/06/2019)

D. Manuel Anxo Fernández Baz

D.^a Carmen Diéguez González

Portavoz:

D. Manuel Anxo Fernández Baz

Suplente:

D.^a Carmen Diéguez González”.

5.- PROPOSTA DA ALCALDÍA SOBRE A PERIODICIDADE DAS SESIÓNS DO PLENO E DA XUNTA DE GOBERNO LOCAL.

O sr. alcalde da conta da proposta sobre a periodicidade das sesións do Pleno e da Xunta de Goberno Local, de 3 de xullo de 2019, que se recolle a continuación.

“PROPOSTA DA ALCALDÍA SOBRE A PERIODICIDADE DAS SESIÓNS DO PLENO E DA XUNTA DE GOBERNO LOCAL

Visto o disposto nos artigos 4.1.a) e 46.1 e 2.a) da Lei 7/1985, de 2 de abril, reguladora das bases de réxime local (LRBRL), artigo 47 do R.D. Lexislativo 781/1986, de 18 de abril, polo que se aproba o Texto Refundido das disposicións legais vixentes en materia de Réxime Local (TRRL), artigos 210 e 211 da Lei 5/1997, do 22 de xullo, de Administración Local de Galicia (LALGA), artigos 38, 78 e 112 do R.D 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais (ROF), e artigos 11 e 19 do Regulamento Orgánico Municipal (ROM).

Considerando que segundo o previsto no artigo 19.2 do ROM do Concello de Teo, o Pleno celebrará sesión ordinaria como mínimo cada mes, nos días e horas que se fixen por acordo plenario e que poderán ser cambiados en calquera momento posterior por dito órgano.

Considerando que, segundo o previsto no artigo 11 do ROM, a Xunta de Goberno Local celebrará sesións ordinarias o primeiro e terceiro luns de cada mes, ás 14 horas, e extraordinarias e urxentes cando sexan convocadas polo alcalde ou a instancia de polo menos unha cuarta parte do número legal dos seus compoñentes.

En virtude do exposto e de acordo coa normativa citada, proponse ao Pleno a adopción do seguinte ACORDO:

Primeiro.- Que se celebre Pleno ordinario o último mércores de cada mes, excepto no mes de agosto, ás 20 horas. Se coincide con día inhábil celebrárase o anterior día hábil á mesma hora.

Segundo.- De acordo co anterior, o Pleno celebrará a súa primeira sesión ordinaria o mércores 31 de xullo de 2019.

Terceiro.- A Xunta de Goberno Local celebrará sesións ordinarias o primeiro e terceiro luns de cada mes ás 14 horas (ás 13 horas cando exista horario reducido), e extraordinaria e urxente cando sexan convocadas polo alcalde ou a instancia de polo menos unha cuarta parte do número legal dos seus compoñentes.

A estes efectos entenderase que a referencia ao primeiro e terceiro luns, deben ser hábiles, celebrándose, noutro caso, o primeiro día hábil seguinte.

Cuarto.- O presente acordo surtirá efecto dende o día seguinte ao da súa adopción, sen prexuízo de levar a cabo as actuacións necesarias para incorporar o seu contido, no que sexa preciso, ao ROM.”.

Aberta a primeira quenda de intervencións, o portavoz do BNG, sr. Fernández, sinala que non teñen nada que dicir posto que se trata do mesmo que os últimos catro anos. Di o sr. Fernández que aproveita para propor unha cuestión de orde, que ten que ver co sitio que ocupan os grupos no Salón de Plenos, e propón que o goberno municipal estea todo xunto na mesma mesa enfronte do público.

O sr. alcalde sinala que historicamente aos grupos se lles deixa elixir onde se sentan, salvo que existira competencia, porén o PSOE amosará o seu parecer, engadindo que se queren ocupar o sitio proposto polo sr. Fernández non habería ningún problema.

O sr. Fernández pensa que é a ubicación máis democrática, porque é como se lle está dando a cara á oposición e ao público, tratándose polo tanto de algo a ter en conta.

Intervén a portavoz do PSOE, sra. Lemus, quen amosa o apoio do seu grupo á proposta formulada polo sr. alcalde. Tratándose da colocación di que entende que agora o sr. Fernández teña moita preocupación pola ubicación do PSOE, pese a que non a tivo nos últimos catro anos nos que tamén formaban parte do goberno, engadindo que en todo caso están onde están por decisión propia, agradecendo en todo caso ao sr. Fernández a súa preocupación.

Intervén o portavoz do PP, sr. Guerra, sinala que dende o seu grupo están de acordo coa proposta do sr. Fernández, de que as persoas que integran o goberno se senten de cara ao público.

O sr. alcalde sinala que o goberno non ten vocación autoritaria e polo tanto vai a deixar que cada quen se sente onde considere oportuno.

O sr. Fernández di que non sabe se existe algún problema en que o goberno municipal estea todo xunto.

O sr. alcalde sinala que se trata dun problema de espazo, que é xusto.

O sr. Fernández di que se se trata dun problema de espazo aínda o entende, porén existe unha cuestión que é clara e así se tería ao goberno municipal de fronte.

Rematado o debate e sometido o asunto a votación, o Pleno da Corporación, por unanimidade dos seus membros (4 Son de Teo, 4 PSdeG-PSOE, 7 PP e 2 BNG), acorda:

Primeiro.- Que se celebre Pleno ordinario o último mércores de cada mes, excepto no mes de agosto, ás 20 horas. Se coincide con día inhábil celebrárase o anterior día hábil á mesma hora.

Segundo.- De acordo co anterior, o Pleno celebrará a súa primeira sesión ordinaria o mércores 31 de xullo de 2019.

Terceiro.- A Xunta de Goberno Local celebrará sesións ordinarias o primeiro e terceiro luns de cada mes ás 14 horas (ás 13 horas cando exista horario reducido), e extraordinaria e urxente cando sexan convocadas polo alcalde ou a instancia de polo menos unha cuarta parte do número legal dos seus compoñentes.

A estes efectos entenderase que a referencia ao primeiro e terceiro luns, deben ser hábiles, celebrándose, noutro caso, o primeiro día hábil seguinte.

Cuarto.- O presente acordo surtirá efecto dende o día seguinte ao da súa adopción, sen prexuízo de levar a cabo as actuacións necesarias para incorporar o seu contido, no que sexa preciso, ao ROM.

6.- PROPOSTA DA ALCALDÍA DE CREACIÓN E COMPOSICIÓN DAS COMISIÓNS INFORMATIVAS E XUNTA DE PORTAVOCES.

O sr. alcalde da conta da proposta de creación e composición das Comisións Informativas e Xunta de Portavoces, de 3 de xullo de 2019, que se recolle a continuación.

“PROPOSTA DA ALCALDÍA RELATIVA Á CREACIÓN E COMPOSICIÓN DAS COMISIÓN INFORMATIVAS E XUNTA DE PORTAVOCES

Considerando que de acordo co disposto no artigo 20.1.c) da Lei 7/1985, do 2 de abril, reguladora das bases de réxime local (en adiante, LRBRL) e artigo 68.1 da Lei 5/1997, do 22 de xullo, de Administración Local de Galicia (en adiante, LALGA), nos municipios de máis de 5.000 habitantes, existirán órganos que teñan por obxecto o estudo, informe ou consulta dos asuntos que teñen que ser sometidos á decisión do Pleno, así como o seguimento da xestión do Alcalde, a Xunta de Goberno Local e os concelleiros que ostenten delegacións, sen prexuízo das competencias de control que corresponden ao Pleno.

Considerando que, de acordo co establecido nos artigos 116 da LRBRL, 59.2.c) e 66.1 da LALGA, artigo 15 do ROM e preceptos concordantes do R.D. 2568/1986, do 28 de

novembro, polo que se aproba o Regulamento de organización, funcionamento e réxime xurídico das Entidades Locais (ROF), a Comisión Especial de Contas existirá en todos os Concellos.

Considerando que de acordo co establecido no artigo 14.3 e 4 do Regulamento Orgánico Municipal, as Comisións estarán integradas exclusivamente por membros da Corporación e presididas polo Alcalde, podendo este delegar a presidencia efectiva en calquera membro da mesma, debendo estar integrada cada comisión de forma que a súa composición se acomode á proporcionalidade existente entre os distintos grupos políticos representados na Corporación.

Considerando que segundo o apartado 3 do artigo 20 LRBRL os propios municipios, nos Regulamentos Orgánicos, poderán establecer e regular outros órganos complementarios, de conformidade co previsto no artigo citado e nas leis das Comunidades Autónomas.

Considerando que segundo o artigo 59.2d) LALGA, poderán complementar a organización municipal, ademais dos órganos establecidos no artigo citado, calquera outro órgano establecido polo Concello e regulado polo seu regulamento orgánico, debendo responder a creación dos órganos complementarios aos principios de eficacia, economía organizativa e participación cidadá e esixir o cumprimento dos requisitos aos que se refire o apartado 3 do artigo 59 LALGA.

Considerando que de acordo co establecido no artigo 16-a) do ROM a Xunta de Portavoces é un órgano complementario colexiado, sen atribucións resolutorias, que ten por función o estudo, consulta e proposta, de calquera asunto de incidencia municipal de competencia plenaria de conformidade co disposto no artigo 22 LRBRL. Estará integrada exclusivamente polos portavoces dos diferentes grupos municipais ou os seus suplentes e presidida polo Alcalde, podendo este delegar a presidencia efectiva en calquera membro da mesma.

En virtude do exposto e de conformidade co disposto na normativa citada, propónse ao Pleno a adopción do seguinte acordo:

Primeiro.- Crear as seguintes **Comisións Informativas Permanentes:**

Comisión Informativa de Urbanismo, Infraestruturas, Sostibilidade e Servizos básicos.

Comisión Informativa de Administración, Cultura, Educación, Seguridade cidadá, Participación veciñal e Deportes

Comisión Informativa de Persoal, Comunicación, Normalización lingüística, Mocidade e Medio Natural.

Comisión Informativa de Benestar social, Igualdade, Transportes, Turismo, Comercio e Emprego

Comisión Informativa de Facenda e Asuntos Económicos, que asume as funcións da Comisión Especial de Contas.

Segundo.- A composición de todas as Comisións Informativas, será a seguinte:

- 3 concelleiros/as do PP
- 1 concelleiro/a de SONdeTEO
- 2 concelleiros/as do PSdeG-PSOE
- 1 concelleiro/a do BNG

O alcalde é o Presidente nato de todas as Comisións Informativas, porén, a presidencia efectiva poderá delegala en calquera membro da corporación, a proposta da propia Comisión, tras a correspondente elección efectuada no seu seno

Terceiro.- A sesións ordinarias das Comisións Informativas terán a mesma periodicidade que as dos Plenos, celebrándose nos días e horas que estableza o Alcalde ou presidente da Comisión, os cales poderá así mesmo convocar sesións extraordinarias ou urxentes.

Cuarto.- De conformidade co artigo 125 do ROF a adscrición concreta a cada Comisión Informativa dos membros da corporación, realizarase mediante escrito do/a

Portavoz de cada grupo dirixido ao alcalde, e do que se dará conta ao Pleno, podendo designarse de igual forma, un suplente por cada titular.

Quinto.- Constituír a **Xunta de portavoces** que, de acordo co establecido no artigo 16-a) do ROM, estará integrada exclusivamente polos portavoces dos diferentes grupos municipais ou os seus suplentes. A Presidencia lle corresponde ao alcalde, podendo este delegar a presidencia efectiva en calquera membro da mesma.

Sexto.- De conformidade co artigo 16-a) ROM, a designación dos suplentes dos portavoces dos diferentes grupos que integran a Xunta de portavoces, realizarase mediante escrito do/a portavoz do grupo municipal, do que se dará conta ao Pleno.”.

O sr. alcalde salienta que historicamente as Comisións Informativas non veñen sendo moi produtivas e non valen para o que tiñan que valer e nese senso di que fai un chamamento a todos e pide que se intente que as discrepancias que existan ou as posibilidades de acordo se expliciten en Comisión Informativa, porque é a forma de non ter que verse con propostas alternativas na propia sesión do Pleno.

Pide o sr. alcalde que, de saír adiante a proposta, canto antes se poida se faciliten os membros que forman parte da propia Comisión, para poder facer a convocatoria das Comisións informativas do Pleno ordinario do 31 de xullo.

Preguntado polo sr. alcalde o portavoz do BNG, sr. Fernández, a portavoz do PSdeG-PSOE, sra. Lemus, e o portavoz do PP, sr. Guerra, non fan uso das súas quendas de intervención.

Sometido o asunto a votación, o Pleno da Corporación, por unanimidade dos seus membros (4 Son de Teo, 4 PSdeG-PSOE, 7 PP e 2 BNG), acorda:

Primeiro.- Crear as seguintes **Comisións Informativas Permanentes**:

Comisión Informativa de Urbanismo, Infraestruturas, Sostibilidade e Servizos básicos.

Comisión Informativa de Administración, Cultura, Educación, Seguridade cidadá, Participación veciñal e Deportes

Comisión Informativa de Persoal, Comunicación, Normalización lingüística, Mocidade e Medio Natural.

Comisión Informativa de Benestar social, Igualdade, Transportes, Turismo, Comercio e Emprego

Comisión Informativa de Facenda e Asuntos Económicos, que asume as funcións da Comisión Especial de Contas.

Segundo.- A composición de todas as Comisións Informativas, será a seguinte:

- 3 concelleiros/as do PP
- 1 concelleiro/a de SONdeTEO
- 2 concelleiros/as do PSdeG-PSOE
- 1 concelleiro/a do BNG

O alcalde é o Presidente nato de todas as Comisións Informativas, porén, a presidencia efectiva poderá delegala en calquera membro da corporación, a proposta da propia Comisión, tras a correspondente elección efectuada no seu seno

Terceiro.- A sesións ordinarias das Comisión Informativas terán a mesma periodicidade que as dos Plenos, celebrándose nos días e horas que estableza o Alcalde ou presidente da Comisión, os cales poderá así mesmo convocar sesións extraordinarias ou urxentes.

Cuarto.- De conformidade co artigo 125 do ROF a adscrición concreta a cada Comisión Informativa dos membros da corporación, realizarase mediante escrito do/a Portavoz de cada grupo dirixido ao alcalde, e do que se dará conta ao Pleno, podendo designarse de igual forma, un suplente por cada titular.

Quinto.- Constituír a Xunta de portavoces que, de acordo co establecido no artigo 16-a) do ROM, estará integrada exclusivamente polos portavoces dos diferentes

grupos municipais ou os seus suplentes. A Presidencia lle corresponde ao alcalde, podendo este delegar a presidencia efectiva en calquera membro da mesma.

Sexto.- De conformidade co artigo 16-a) ROM, a designación dos suplentes dos portavoces dos diferentes grupos que integran a Xunta de portavoces, realizarase mediante escrito do/a portavoz do grupo municipal, do que se dará conta ao Pleno.

7.- PROPOSTA DA ALCALDÍA SOBRE DEDICACIÓNS EXCLUSIVAS E PARCIAL.

O sr. alcalde da conta da proposta sobre dedicacións exclusivas e parcial, de 3 de xullo de 2019, que se recolle a continuación.

“PROPOSTA DA ALCALDÍA

O artigo 75 da Lei 7/1985, de 2 de abril, reguladora das bases do réxime local (LRBRL), reconece o dereito dos membros das Corporacións locais a percibir retribucións polo exercicio dos seus cargos, cando os desempeñen con dedicación exclusiva ou parcial, sendo dados de alta no Réxime Xeral da Seguridade Social e asumindo as Corporacións o pago das cotas empresarias que corresponda.

Neste contexto cabe salientar que as atribucións que a normativa vixente en materia de réxime local lles encomenda aos alcaldes fai preciso que, para acadar a maior eficacia no desempeño das mesmas, o cargo de alcalde deba exercerse con dedicación exclusiva, así como as dedicacións exclusivas e parciais a concelleiros/as necesarias para o eficaz e axeitado funcionamento das distintas áreas municipais.

En virtude do exposto, estudadas as especiais características do Concello e de acordo co establecido nos artigos 75, 75 bis, 75 ter. 1. f) e co artigo 13 do R.D. 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais (ROF), e a disposición adicional trixésimo quinta da Lei 6/2018, de 3 de xullo, de Orzamentos Xerais do Estado para o ano 2018,

prorrogado para a anualidade en curso, propónse ao Pleno a adopción do seguinte ACORDO:

Primeiro.- Aprobar a dedicación exclusiva para o cargo de alcalde, cunhas retribucións brutas anuais de 43.000€, non podendo percibir asistencias pola concorrencia efectiva ás sesións dos órganos colexiados de que forme parte, pero si percibir indemnizacións polos gastos ocasionados polo exercicio do cargo, cando sexan efectivos, e previa xustificación dos mesmos.

Ditas retribucións actualizaranse anualmente na porcentaxe na que o fagan as retribucións dos funcionarios/as municipais, e percibirase en catorce pagas anuais (doce ordinarias e dúas extraordinarias, en xuño e decembro, polo mesmo importe).

Segundo.- Aprobar a dedicación exclusiva, que implicará dedicación preferente ás tarefas propias do cargo, para as concellarías que se detallan a continuación:

- 1.- Concellería de Urbanismo, Seguridade cidadá, Enerxía e Sostibilidade.
- 2.- Concellería de Mobilidade, Comercio, Turismo, Emprego e Igualdade.
- 3.- Concellería de Benestar, Persoal e Deportes.
- 4.- Concellería de Educación, Cultura, Administración e Participación veciñal,

A retribución anual que percibirá o/a concelleiro/a responsable de cada unha das concellerías citadas será de 34.400,00€ brutos anuais, non podendo percibir asistencias pola concorrencia efectiva ás sesións dos órganos colexiados de que forme parte, pero si percibir indemnizacións polos gastos ocasionados polo exercicio do cargo, cando sexan efectivos, e previa xustificación dos mesmos.

Ditas retribucións actualizaranse anualmente na porcentaxe na que o fagan as retribucións dos funcionarios/as municipais, e percibirase en catorce pagas anuais (doce ordinarias e dúas extraordinarias, en xuño e decembro, polo mesmo importe).

Terceiro.- Aprobar a dedicación parcial, cunha dedicación das tres cuartas partes da xornada, para realizar as tarefas propias do cargo para a concellería de servizos básicos, coa retribución bruta anual de 25.800,00€, non podendo percibir asistencias pola concorrencia efectiva ás sesións dos órganos colexiados de que forme parte, pero si percibir indemnizacións polos gastos ocasionados polo exercicio do cargo, cando sexan efectivos, e previa xustificación dos mesmos.

Ditas retribucións actualizaranse anualmente na porcentaxe na que o fagan as retribucións dos funcionarios/as municipais, e percibirase en catorce pagas anuais (doce ordinarias e dúas extraordinarias, en xuño e decembro, polo mesmo importe).

Cuarto.- Solicitar ante a Tesourería Xeral da Seguridade Social a alta dos membros da Corporación con dedicación exclusiva e dedicación parcial, asumindo o Concello as obrigas que as normas do Réxime Xeral da Seguridade Social impoñen ás empresas en relación cos traballadores ao seu servizo.

Quinto.- Asumir o pagamento da cotas empresariais que correspondan en virtude deste acordo.

Sexto.- Facer público o presente acordo segundo o previsto na normativa aplicable.”.

O sr. alcalde explica que a proposta que se presenta é froito da negociación entre dúas forzas políticas xa que houbo unha terceira forza que declinou participar no goberno. Sinala que se partía dunha posición de Son de Teo que consideraba oportuno recuperar as dedicación exclusivas do ano 2007, e contar con cinco dedicacións e media ou seis. Froito desa negociación Son de Teo aceptou unha proposta do PSOE de incrementar as contías, non ao nivel de 2007, senón nun 7 %, que se correspondería co IPC dende o ano 2011. Sinala o sr. alcalde que se sae adiante a proposta as retribucións dos/as concelleiros/as estarán un 7% por debaixo das do ano 2007 e explica que ese incremento, que deriva do IPC, propónse tamén para as asignacións aos grupos así como para a asistencia aos demais órganos colexiados.

Aberta a primeira quenda de intervencións, o portavoz do BNG, sr. Fernández, sinala que Son de Teo e o PSOE suman 8 concelleiros/as e coñecen a proposta do BNG, que consiste en cinco dedicacións exclusivas, sen incrementar a masa salarial do anterior mandato, porén persisten na súa proposta.

Aclara o sr. Fernández que o BNG apoiou ao sr. Sisto para que fora alcalde, pero deixando claro que non era un cheque en branco e propuxo naquel momento, e seguen mantendo, diálogo e consenso porén a resposta é a imposición.

Anuncia o sr. Fernández que o seu grupo non vai a apoiar a proposta.

Intervén a portavoz do PSdeG-PSOE, sra. Lemus, e sinala que efectivamente se trata dunha proposta consensuada entre as dúas forzas políticas. Sinala que igual que eles chegaron a un acordo, cun argumentario ao efecto, que xustifica porque uns salarios ou outros ou unhas dedicacións ou outras, se a proposta vai a ser denegada agradecería saber, de forma argumentada, os posicionamentos das diferentes forzas políticas.

Intervén o portavoz do PP, sr. Guerra, quen sinala que non están de acordo coa proposta porque, aínda que son inferiores ás do ano 2007, son superiores ás do 2015.

O sr. alcalde explica que se trata dunha discusión que sempre é complexa e difícil e que se presta bastante a demagogia, e ademais como o que fixa a lexislación son topes sempre queda marxe para utilizarse como medida de presión e con múltiples circunstancias. Tratándose da posición do BNG sinala que, respectándoa, non se trata dunha posición ideolóxica e non e unha posicións de principios programáticos, nin sequera unha posición de principios, porque de ser así, se se mira o que pasa noutros concellos veciños, sería consecuente con esa situación. Sinala que basta cruzar Vilar de Calo, e pasar ao Milladoiro, para ver que o primeiro Tenente de Alcalde do BNG, no concello de Ames, vai a cobrar 39.750 €, 6.000 € máis que a primeira Tenente de Alcalde de Teo, resultando ademais que a masa salarial de Teo, que ascende a 206.000 €, fronte a Ames que ascende a 386.900 €, polo tanto a posición do BNG non debe ser moi de principios.



Salienta que o que máis lle molesta é que senón é unha posición programática está claro que é una posición táctica, en función das circunstancias, co fin de bloquear o posible goberno, porque senón non tería razón algunha que no ano 2007, cando eran concelleiros tanto el como o sr. Fernández, cobraran 36.434 € e agora propónse 34.400 €, polo que dende o BNG se debería explicar a razón pola que, porque en plena crise económica, se tiveron eses soldos, que lle parecen razoables, e agora facendo unha proposta menor se lles diga que non. Considera o sr. alcalde que polo tanto non existe un posicionamento político senón un posicionamento “á *contra*”. Explica o sr. alcalde que na masa salarial acontece o mesmo, e así no 2011 esta era de 248.000 € e a proposta de hoxe é de 234.220 €, polo que quixera saber a razón de porque un concelleiro no ano 2019 ten que cobrar menos que cando o sr. Fernández era concelleiro.

Aberta a segunda quenda de intervencións, o portavoz do BNG, sr. Fernández, sinala que hai unha cuestión fundamental que é que dende as eleccións do 26 de maio existiu un cambio de correlación de forzas, algo que hai que ter moi en conta. Salienta que o BNG dende o primeiro momento manifestou a súa vontade de dialogar e consensuar, como ven sabe o sr. alcalde, e unido a unha premisa básica de que non gobernase o PP, apoiaron o sr. alcalde, porén non foi ningún cheque en branco, como é lóxico, porque existe uns 1.200 veciños/as que votaron polo BNG, senón votarían por Son de Teo ou polo PSOE e xa estaba.

Sinala que dende aquel momento iniciouse un proceso de confrontación entre Son de Teo e PSOE, pola alcaldía, e despois polas dedicacións, iso foi o que transcendeu, co conseguinte bloqueo do concello durante tres semanas.

Pregunta o sr. Fernández quen paraliza, quen tende a man para negociar ou quen impón, quen lle propón cinco dedicacións exclusivas e non aumentar masa salarial, ou quen, sen ter unha maioría suficiente, trae unha proposta pechada, e xa non é que a traia senón que a fai pública pola prensa e despois lles informa da súa proposta nunha reunión que houbo posteriormente a coñecer esa proposta.



Sinala o sr. Fernández que o sr. alcalde fala de demagogia, e está claro que é demagogia, porque o BNG non falou das cantidades que debe cobrar un/unha concelleiro/a ou o alcalde, engadindo que se o sr. alcalde quere gañar 47.000 € o BNG non ten ningún problema, sempre que existan cinco dedicacións exclusivas.

Sinala que o BNG nunca dixo que un alcalde ou concelleiro/a dun goberno municipal non deberían cobrar. Explica que cando el formaba parte do goberno municipal, no 2011, el mesmo e o sr. alcalde cobraban 36.434,46 €, mais outros dous concelleiros con dedicación, e corenta e catro mil setecentos e pico de euros, o sr. alcalde. Di o sr. Fernández que se o queren cobrar agora, que o cobren, engadindo que en todo caso con cinco dedicacións.

Sinala o sr. Fernández que o sr. alcalde fala do montante da masa salarial e de que había dúas persoas de confianza, a xefa de gabinete e a de prensa, engadindo que non sabe se o sr. alcalde lembra, cando foi a cuestión de confianza do ano 2014, cal era a proposta do BNG, que era eliminar un dos cargos de confianza.

Conclúe o sr. Fernández que non se pode dicir que o BNG xoga fora de principios, porque o BNG actúa cunha coherencia absoluta, porque aínda que existira un incremento, non se di que non, pero con cinco dedicacións.

Sinala que cando fala de masa salarial se refire a cargos políticos. Salaria o sr. Fernández que o sr. alcalde teña unha persoa que o asiste é unha necesidade fundamental e non está en discusión, por iso el fala de cargos políticos, porén se se fala de cargos de confianza hai que lembrar a proposta do BNG para aqueles orzamentos antes da cuestión de confianza.

Di o sr. Fernández que o sr. alcalde fala do goberno de 2011, e lembra que en novembro do 2011, existiu unha proposta do PP que propoñía tres dedicacións e media e argumentaban que eran suficientes para xestionar o concello de Teo, e viuse a argumentación da sra. Lemus de que por responsabilidade había que apoiar esa proposta.

Lembra o sr. Fernández que o das tres dedicacións e media para un goberno con maioría absoluta do BNG, non foi adiante, e os nove votos en contra foron os do BNG. En abril de 2012 o PSOE presentou unha moción propoñendo a redución do goberno municipal a dúas dedicacións e media e o BNG votou en contra e aí están os argumentos.

Explica o sr. Fernández que a proposta da sra. Lemus, apoiada polo PP, reducía a dúas e media as dedicación e a sra. Lemus dicía que *“deixou claros os criterios, sinalando que a área de vías e obras a levaba antes o Sr. Sisto e que a pode seguir levándo e no caso da concellería de servizos sociais se poderían aforrar eses 25.000 € porque existen técnicos nese departamento, o concelleiro de urbanismo é imprescindible para o desenrolo do PXOM e o alcalde é o alcalde”*.

Salienta que aquela área que levaba so o sr. alcalde hoxe está repartido entre a sra. Lemus e o sr. Roberto Moñino, e incluso dicía a sra. Lemus daquela que o sr. alcalde levava servizos básicos, que ben podía.

Salienta o sr. Fernández que el non comparte esa opinión, porén iso se dixo no Pleno, e o BNG votou en contra disto, e fronte a tres e medida e dúas a media, o BNG propón cinco dedicacións, como o goberno do BNG do ano 2011, polo tanto ten unha coherencia absoluta.

Sinala que cando fala de incrementar a masa salarial fala do incremento dun 11,6 % por cento con respecto a hai un mes, no mandato anterior, cando o goberno de Son de TEO e PSOE , con maioría absoluta, o poderían ter feito, porque tiñan a maioría, porén agora as circunstancias cambiaron.

Sinala o sr. Fernández que os argumentos do BNG están clarísimos.

Remata o sr. Fernández a súa intervención sinalando que agarda que durante estes catro anos a actitude do goberno municipal mude, porque así van a encontrar ao BNG en todos os sitios, e chegarán a acordos, pero en base ao diálogo, non á imposición.

Intervén a portavoz do PSdeG-PSOE, sra. Lemus, quen sinala que leva de concelleira dende o ano 2011 e este tema xa se debateu múltiples veces. Sinala que é claramente diferenciable, porque cando no ano 2012 se fixo a moción do PP, existía un plan de saneamento que implicaba un recorte en prazas de oferta de emprego público, pola situación económica do concello, situación na que non se atopa agora. Sinala que isto non xustifica máis que un posicionamento no ano 2012, engadindo que tamén se podería falar das posicións do PSOE no ano 2015, cando xa estaban no goberno.

Sinala que máis que proposta o que existe un relatorio do que aconteceu, tildado ademais con algunha característica de falta de cariño, falta de amor e de diálogo, así como un pouco de “*non me tratedes así*” e incluso un “*estaremos aquí*”, engadindo que agarda que a posición do BNG sexa máis construtiva.

Sinala a sra. Lemus que, sen prexuízo da posición de forza que quere dar o BNG, os sete concelleiros/as do PP teñen bastante máis forza, engadindo que o di para colocarse cada un no seu sitio, recoñecendo que eles son catro e tamén o saben. Sinala que, cando eran dous, se podería pensar que eran a chave, porén ao final non eran máis que dous concelleiros dos dezasete.

Sinala a sra. Lemus que do que se trata é de formar goberno e de ter persoas traballando polas mañás, e agora mesmo non hai ninguén, porque cada un anda no seu traballo, engadindo que ela non pisa o concello de Teo dende o día 16 de xuño. Considera que se podería dicir que se prolongaron, e poden recoñecer súa parte de culpa, porén dende o 3 de xuño se coñecía esta proposta. Sinala que aínda que pode ser que as formas non foron ás mais convenientes, foi cousa súa, non de Son de Teo, porque lle chamou a prensa, e llo comentou, pois lle parecía que non era un tema no que houbera que ocultar nada, e non é tan melodramático. Considera a sra. Lemus que se peca un pouco de personalismo, e mentres tanto mañá o concello de Teo seguirá sen goberno.

Di a sra. Lemus que non sabe que lle parece á xente, di que non ve á xente preocupada polo posicionamento de cada un, senón por quen leva as áreas e quen

está a gobernar. Sinala que ve que non vai a existir goberno e iso si que lle preocupa bastante máis.

A sra. Lemus di que o BNG considera unha imposición unha proposta da alcaldía, que por certo se colocou de alcalde polo BNG e PSOE, e como tal o alcalde tiña a responsabilidade de formar goberno e iso fixo. Opina a sra. Lemus que tiveron as súas cousas, porén hai momento en que teñen que prevalecer outras posicións, porén se o BNG quere seguir coa dinámica de que todo o que se propón dende a alcaldía é unha imposición, pois aquí van a ter que verse moitas máis veces durante catro ano, entón isto vai a ser complicado.

Agarda a sra. Lemus que se melloren os posicionamentos previos porque senón vai a ser un mandato complicado.

Explica a sra. Lemus que se algo ten que destacar deste mes é que as confrontacións teñen un punto, e eles sabían onde tiñan que parar e ceder, por moito que lles doese, ademais hai un momento en que Teo está por enriba de todos e para moitos agora mesmo non o está.

Intervén o portavoz do PP, sr. Guerra, quen agradece á sra. Lemus que se recoñeza que foi o PP o que gañou as eleccións, sete, catro, catro dous, e agora están todos aquí repartíndose un pastel e campando as súas anchas.

Sinala o sr. Guerra que dende o 26 de maio non houbo nin un xesto nin unha chamada cara aos sete concelleiros/as do PP.

Reitera o sr. Guerra o posición do seu grupo en relación á proposta, que se concreta nun voto en contra.

O sr. alcalde sinala que o argumentario do BNG resulta moi curioso, porque se pode cobrar o que se queira, porén so cinco dedicacións, entendendo que o BNG debe explicar qué é o importante os cartos ou as persoas que veñen a traballar ao concello,

cando o razoamento debería ser falar dun límite de cartos, porén o BNG limita a cinco as dedicacións, non vaia a ser que os/as concelleiros/as traballen de máis e o fagan moi ben, sendo esa a traslación lóxica.

Pregunta o sr. alcalde cá é o problema de que traballen cinco e media en vez de cinco, porque igual hai que empezar a contar o número de xubilados que había noutros gobernos, e actualmente o sr. Moñino tamén está xubilado, e aproveitar a persoas que estean xubiladas para facer ese traballo é lícito, porén tamén detraen o número de dedicacións exclusivas.

Sinala o sr. alcalde que Son de Teo tamén foi moi coherente en todo este tempo, porque o feito de que a xente veña a traballar e traballe, é perfecto, sexa de quen sexa, e por iso non se entende o de cinco, cinco para qué, unicamente para gañar e para dicir *“aquí gaño eu”*.

O sr. alcalde explica que aguantarán ata setembro, xa que ese mes terá que irse ao instituto, e xa se verá, aínda que no instituto xa está, pero está de vacacións.

Considera o sr. alcalde que o problema é que o resultado das eleccións foi complexo. Explica que ao PP non se dirixiu porque interpretou o resultado das eleccións, no senso de que existía unha maioría de esquerdas, fronte aos sete concelleiros/as do PP. Salienta que estes concelleiros/as do PP son moi respectables, non ten nada que ver, porén á hora de facer un goberno non o vai a facer co PP porque parten de posicións ideolóxicas moi diferentes.

Sinala o sr. alcalde que se se está aquí traballando para facer un goberno, para sacar ao concello desta parálise na que está, por falta de xente que poida traballar aquí, porque o que non cobra no pode traballar, o lóxico é que se centre os seus esforzos en facer un goberno.

Considera o sr. alcalde que o mandato electoral foi moi claro, había tres forzas de esquerdas que tiñan que formar un goberno, para ter a maioría, porén o problema é

que un dos actores, que é o BNG, está moito máis cómodo fora. Considera que o BNG non entra no goberno, non porque faga unha proposta de programa e se lle diga que non, senón que non entra porque parten dunha posición apriorística de que non queren entrar e deben explicar iso, deben explicar que non queren entrar a traballar para solucionar os problemas da xente.

Sinala o sr. alcalde que non foi por falta de opcións xa que se lle ofreceu entrar a un goberno a tres un goberno a dous, ofrecéuselles entrar na Xunta de Goberno, e non quixeron, tratándose dunha posición moi cómoda e irresponsable con respecto á cidadanía, que quixo que houbera un goberno das tres forza da esquerda.

Considera o sr. alcalde que a posición do BNG desvirtúa o goberno, porque equipara a esquerda nacionalista coa esquerda de obediencia do Estado, catro a catro, cando o goberno debería ter seis concelleiros de posición nacionalista e catro de posición de obediencia estatal, porque iso foi o que votou a xente. O sr. alcalde sinala que nalgún momento o BNG explicará cal é esa posición. Considera que agora este é un momento de gloria, despois de dicir non sistematicamente, dependen deles, porén se desvirtúa absolutamente o mandato da cidadanía.

Sinala o sr. alcalde que se o BNG non asume esa posición, a poden adornar como queren, porén o único real é que a proposta que hoxe se fai é que os/as concelleiros/as cobren menos que no ano 2011, en plena crise, cando o BNG estaba no goberno, e terán que explicar porque din que non a iso. Salia que a masa salarial é inferior a cando estaban no goberno o BNG, e haberá que explicar por qué, porque un concelleiro de 2019 ten que cobrar menos que un concelleiro do 2012 e porque os cartos investidos en gobernar teñen que ser inferiores a cando eles estaban no goberno, pese a que a proposta é xenerosa, porque incluso é inferior.

O sr. alcalde sinala que é moi fácil dicir que hai que negociar, porén a negociación é cando existe unhas propostas argumentada e son coherentes.

Considera o sr. alcalde que o que prima así é obstaculizar o goberno, porén seguirán así, non hai problema, e a ver ata onde aguantan, engadindo que o único que padece as consecuencias é a cidadanía de Teo.

Sinala o sr. alcalde que plantexaron de todo, e se o BNG segue nesa posición tirarán para diante, por responsabilidade, e o BNG é libre de decidir o que fai, porque son libres de facelo, porén o terán que pensar.

A petición do BNG, o sr. alcalde di que non hai problema en abrir unha nova quenda de intervencións, porque se trata de debater non de quitarlle a palabra a ninguén, esperando que así se escoite algunha resposta ás cuestións plantexadas.

A concelleira do BNG, sra. Diéguez, dille ao sr. alcalde que agora non serve gritar, aínda que outras veces servía.

O sr. Fernández di que a sra. Lemus falou da situación económica do 2011, da débeda daquel momento, que era de tres millóns de euros, e agora é de case cinco millóns, engadindo que o di en relación con eses argumentos que utiliza a sra. Lemus, e para desfacer o que se di.

Sinala o sr. Fernández que o sr. alcalde fala de xubilados e explica que quizais haberá que poñer nas candidaturas un tope de xubilados ou un mínimo, porque ao final se farán máis beiravías, e cando fala dos xubilados de 2011 e 2019, hai que lembrar que no 2011 tamén había un prexubilado. Pídelle ao sr. alcalde que non faga demagoxia.

O sr. Fernández di que o sr. alcalde fala de demagoxia, salienta que el que non a fai e lembra que na reunión que tiveron, tamén co PSOE, diante daquel panorama, decidiron non entrar no goberno municipal, cando ademais aquilo era “*que decida o BNG*”.

Sinala o sr. Fernández que o sr. alcalde pode gobernar tranquilamente, porén hai que dialogar e consensuar co BNG, engadindo que non sabe onde está o problema. Se o

BNG estivera no goberno, igual había tamén cinco dedicacións, e habería que amañarse, porén como non se deu esa situación esa non é a realidade.

Sinala o sr. Fernández que existe un goberno, tal e como se desprende dos Decretos dos que se dou conta hoxe nos que se delegaban as competencias.

O sr. Fernández insiste en que o máis importante é que existe unha posición dunha parte e outra doutra, lexítimas as dúas, e a forma de resolvelo é co diálogo. Pídelle ao sr. alcalde que lle diga unha soa vez en que el ou o BNG dixeran que un concelleiro de Teo cobra demasiado, porque así se deixa de facer demagogia ou de mentir.

A portavoz do PSOE, sra. Lemus, e o portavoz do PP, sr. Guerra, non fan uso das súas quendas de intervención.

O sr. alcalde explica que evidentemente houbo delegacións, porén iso non quere dicir que se poida gobernar o concello porque o sr. Iglesias e a sra. Lemus están no seu traballo de oito a tres, polo tanto habería que preguntarse quen fai a labor de concelleiro/a, e se fan a labor de concelleiro/a por telefono nos seus traballo, engadindo que iso non é razoable.

Non é razoable porque está o alcalde, e o que hai son unhas delegacións feitas que non se pode exercer, e esa é a realidade, hai persoas designadas como concelleiros que non poden exercer por unha posición de bloqueo do BNG. Considera o sr. alcalde que non é tal difícil entender o dos xubilados, porque había cinco dedicacións, porque había una persoa xubilada que facía o seu traballo, e o facía ben, por iso bastaban cinco.

Pregunta o sr. alcalde cal é o problema en cobrar menos e repartir entre máis ao considerar que é necesario máis xente para traballar, o que se ve é unha situación de bloqueo e absolutamente irracional, porque aínda non escoitou a primeira razón, engadindo que o único que se ve é que é unha posición de política, de política táctica, de facer ver que os do BNG son os máis fortes, porén os prexudicados son os/as

veciños/as de Teo, polo que chegados a esta situación cada quen terá que asumir as súas responsabilidade.

Sinala o sr. alcalde que asumiron a alcaldía con idea de facer un goberno a tres, e se o BNG entrara no goberno e dixera que hai cinco dedicacións, el intentaría convencelos, por unha cuestión de responsabilidade, de goberno, porén agora nin comen nin deixan comer, se trata de bloquear desde fora, sen entrar. Pregunta o sr. alcalde cal é a razón pola que non entran no goberno, sinalando que a única razón é que se está máis cómodo fora, non hai responsabilidade, e seguirán bombardeando.

Rematado o debate e sometido o asunto a votación, o Pleno da Corporación, con oito votos a favor (4 Son de Teo e 4 PSdeG-PSOE) e nove en contra (7 PP e 2 BNG), acorda rexeitar a proposta da alcaldía sobre dedicacións exclusivas e parcial.

8.- PROPOSTA DA ALCALDÍA SOBRE PERSOAL EVENTUAL.

O sr. alcalde da conta da proposta sobre persoal eventual, de 3 de xullo de 2019, que se recolle a continuación.

“PROPOSTA DA ALCALDÍA SOBRE PERSOAL EVENTUAL”

Constituída a Corporación despois das eleccións municipais que tiveron lugar o pasado día 26 de maio, o Pleno do Concello ten que resolver, entre outros extremos, o relativo á determinación do número, características e retribucións do persoal eventual, para o seu posterior nomeamento mediante Resolución da alcaldía, de conformidade co disposto nos artigos 104 e 104 bis da Lei 7/1985, de 2 abril, Reguladora das Bases do Réxime Local (LRBRL).

Por outra parte, de acordo co previsto no artigo 12 da Lei 7/2007, de 12 de abril, do Estatuto Básico do Empregado Público, ao persoal eventual lle será aplicable, no que sexa axeitado á natureza da súa condición, o réxime xeral dos funcionarios de carreira.

En virtude do exposto, esta alcaldía propón ao Pleno a adopción do seguinte acordo:

Primeiro.- Crear o posto de persoal eventual que se relaciona a continuación, determinando o seu número, características e retribucións:

<u>Denominación do posto:</u>	XEFA DE GABINETE
<u>Número de postos:</u>	1
<u>Características:</u>	<p>Cargo de confianza da alcaldía á quen lle corresponde o seu nomeamento e cese. Cesará automaticamente cando cese a autoridade que a/o nomeou.</p> <p>A súas funcións serán:</p> <p>1º.- Asistir ao alcalde no desenvolvemento de todas as funcións propias do ámbito das súas responsabilidades políticas, xestionando as relacións da alcaldía coa cidadanía e os colectivos veciñais e realizando tarefas administrativas de trámite e colaboración.</p> <p>2º.- Asistir ao alcalde en todo o relativo á súa relación cos medios de comunicación e xestionar a páxina WEB municipal.</p> <p>A xornada laboral será a ordinaria do resto do persoal municipal, sen prexuízo da súa flexibilidade segundo as necesidades da alcaldía.</p>
<u>Retribucións:</u>	<p>27.820,00 euros brutos anuais.</p> <p>Ditas retribucións actualizaranse anualmente na porcentaxe na que o fagan as retribucións do persoal funcionarios do concello, e percibiranse en catorce pagas anuais (doce ordinarias e dúas extraordinarias, en xuño e decembro, polo mesmo importe).</p>

Segundo.- Facer público o presente de acordo co previsto na normativa aplicable, e unha vez cumprimentados todos os trámites procedimentais, publicar no Boletín Oficial da Provincia e na web municipal o nomeamento deste/a funcionario/a de emprego, o seu réxime de retribucións e a súa dedicación, en cumprimento do disposto no art. 104.3 da LRBRL.”.

Preguntado polo sr. alcalde o portavoz do BNG, sr. Fernández, a portavoz do PSdeG-PSOE, sra. Lemus, e o portavoz do PP, sr. Guerra, non fan uso das súas quendas de intervención.

Sometido o asunto a votación, o Pleno da Corporación, con oito votos a favor (4 Son de Teo e 4 PSdeG-PSOE), sete en contra (7 PP) e dúas abstencións (2 BNG), acorda:

Primeiro.- Crear o posto de persoal eventual que se relaciona a continuación, determinando o seu número, características e retribucións:

<u>Denominación do posto:</u>	XEFA DE GABINETE
<u>Número de postos:</u>	1
<u>Características:</u>	Cargo de confianza da alcaldía á quen lle corresponde o seu nomeamento e cese. Cesará automaticamente cando cese a autoridade que a/o nomeou.
	A súas funcións serán:
	1º.- Asistir ao alcalde no desenvolvemento de todas as funcións propias do ámbito das súas responsabilidades políticas, xestionando as relacións da alcaldía coa cidadanía e os colectivos veciñais e realizando tarefas administrativas de trámite e colaboración.
	2º.- Asistir ao alcalde en todo o relativo á súa relación cos medios de comunicación e xestionar a páxina WEB municipal.



A xornada laboral será a ordinaria do resto do persoal municipal, sen prexuízo da súa flexibilidade segundo as necesidades da alcaldía.

Retribucións:

27.820,00 euros brutos anuais.

Ditas retribucións actualizaranse anualmente na porcentaxe na que o fagan as retribucións do persoal funcionarios do concello, e percibiranse en catorce pagas anuais (doce ordinarias e dúas extraordinarias, en xuño e decembro, polo mesmo importe).

Segundo.- Facer público o presente de acordo co previsto na normativa aplicable, e unha vez cumprimentados todos os trámites procedimentais, publicar no Boletín Oficial da Provincia e na web municipal o nomeamento deste/a funcionario/a de emprego, o seu réxime de retribucións e a súa dedicación, en cumprimento do disposto no art. 104.3 da LRBRL.

9.- PROPOSTA DA ALCALDÍA SOBRE RÉXIME ECONÓMICO DAS ASISTENCIAS E INDEMNIZACIÓNS.

O sr. alcalde da conta da proposta sobre réxime económico das asistencias e indemnizacións, de 3 de xullo de 2019, que se recolle a continuación:

“PROPOSTA DA ALCALDÍA

Segundo establece o apartado 3 do artigo 75 da Lei 7/1985, de 2 de abril, reguladora das bases de réxime local (LRBRL), só os membros da Corporación que non teñan dedicación exclusiva nin parcial percibirán asistencias pola concorrencia efectiva ás sesións dos órganos colexiados da Corporación de que formen parte, na contía sinalada polo Pleno.

Así mesmo, o apartado 4 do artigo mencionado sinala que os membros das Corporacións locais percibirán indemnizacións polos gastos efectivos ocasionados no exercicio do seu cargo, segundo as normas de aplicación xeral nas Administracións Públicas e as que en desenvolvemento das mesmas aprobe o Pleno corporativo.

Considerando que, segundo o disposto no artigo 75.5 da LBRL, as Corporacións locais consignarán nos seus Orzamentos as indemnizacións e asistencias ás que se fixo referencia nos parágrafos anteriores, dentro dos límites que con carácter xeral se establezan, no seu caso.

Ao abeiro da normativa citada, propónse ao Pleno a adopción do seguinte ACORDO:

PRIMEIRO.- Fixar como asistencias ás concelleiras e os concelleiros da Corporación que non estean acollidos ao réxime de dedicación exclusiva ou parcial, pola concorrencia efectiva ás sesións e reunións dos órganos colexiados dos que formen parte, os seguintes importes:

Sesións plenarias: 129 euros

Sesións da Xunta de Goberno Local: 80 euros

Sesións das Comisións Informativas: 64 euros, co límite de dúas asistencias ao día por concelleiro/a

Sesións da Xunta de Portavoces: 59 euros

Reunións de outros órganos colexiados: 59 euros

SEGUNDO.- Establecer o seguinte réxime respecto das indemnizacións por aloxamento, manutención, e gastos de viaxe:

1. - Indemnizacións por aloxamento e manutención.

Os membros da Corporación percibirán, se é o caso, as axudas correspondentes ao Grupo 1º do Anexo II, do R.D. 462/2002 do 24 de maio, de indemnizacións por razón do servizo. De conformidade co artigo 10 do Real Decreto anterior no caso das dietas a percibir por aloxamento, de non se aplicar o sistema de concerto, o importe a percibir

será o realmente gastado e xustificado, sen que a súa contía poida exceder da especificada no Real Decreto citado.

2.- Indemnizacións por gastos de viaxe.

Os membros da Corporación terán dereito a ser indemnizados polos desprazamentos que teñan que realizar como consecuencia do exercicio do cargo, sendo aplicable neste caso o previsto no artigo 17 do Real Decreto 462/2002. Respecto ao uso do vehículo particular terase en conta o previsto no artigo 18 do Real Decreto 462/2002 e o acordado en Orde do ministerio de Economía e Facenda 3770/2005 da 1 de decembro pola que se revisa o importe da indemnización por uso de vehículo particular establecida no Real Decreto 462/02.

TERCEIRO.- Publicar integramente o presente acordo no Boletín Oficial da Provincia, no Taboleiro de anuncios, e na páxina web municipal.”.

O sr. alcalde sinala que, como dixo, mantendo o criterio que se mantivera na proposta orixinal das dedicacións exclusiva, propónse unha incremento dun 7% das contías.

Preguntado polo sr. alcalde o portavoz do BNG, sr. Fernández, a portavoz do PSdeG-PSOE, sra. Lemus, e o portavoz do PP, sr. Guerra, non fan uso das súas quendas de intervención.

Sometido o asunto a votación, o Pleno da Corporación, con oito votos a favor (4 Son de Teo e 4 PSdeG-PSOE), sete en contra (7 PP) e dúas abstencións (2 BNG), acorda:

PRIMEIRO.- Fixar como asistencias ás concelleiras e os concelleiros da Corporación que non estean acollidos ao réxime de dedicación exclusiva ou parcial, pola concorrencia efectiva ás sesións e reunións dos órganos colexiados dos que formen parte, os seguintes importes:

Sesións plenarias: 129 euros

Sesións da Xunta de Goberno Local: 80 euros

Sesións das Comisións Informativas: 64 euros, co límite de dúas asistenciais ao día por concelleiro/a

Sesións da Xunta de Portavoces: 59 euros

Reunións de outros órganos colexiados: 59 euros

SEGUNDO.- Establecer o seguinte réxime respecto das indemnizacións por aloxamento, manutención, e gastos de viaxe:

1. - Indemnizacións por aloxamento e manutención.

Os membros da Corporación percibirán, se é o caso, as axudas correspondentes ao Grupo 1º do Anexo II, do R.D. 462/2002 do 24 de maio, de indemnizacións por razón do servizo. De conformidade co artigo 10 do Real Decreto anterior no caso das dietas a percibir por aloxamento, de non se aplicar o sistema de concerto, o importe a percibir será o realmente gastado e xustificado, sen que a súa contía poida exceder da especificada no Real Decreto citado.

2.- Indemnizacións por gastos de viaxe.

Os membros da Corporación terán dereito a ser indemnizados polos desprazamentos que teñan que realizar como consecuencia do exercicio do cargo, sendo aplicable neste caso o previsto no artigo 17 do Real Decreto 462/2002. Respecto ao uso do vehículo particular terase en conta o previsto no artigo 18 do Real Decreto 462/2002 e o acordado en Orde do ministerio de Economía e Facenda 3770/2005 da 1 de decembro pola que se revisa o importe da indemnización por uso de vehículo particular establecida no Real Decreto 462/02.

TERCEIRO.- Publicar integramente o presente acordo no Boletín Oficial da Provincia, no Taboleiro de anuncios, e na páxina web municipal.

10.- PROPOSTA ALCALDÍA DE ASIGNACIÓNS A GRUPOS POLÍTICOS.

O sr. alcalde da conta da proposta de asignacións a grupos políticos, de 3 de xullo de 2019, que se recolle a continuación.

“PROPOSTA DA ALCALDÍA

Segundo establecen os artigos 73.3 da Lei 7/1985, de 2 de abril, e 44.4 do Regulamento Orgánico da Corporación municipal de Teo, o Pleno da Corporación, con cargo aos Orzamentos anuais da mesma, poderá asignar aos grupos políticos unha dotación económica que deberá contar cun compoñente fixo, idéntico para todos os grupos, e outro variable, en función do número de membros de cada un deles, dentro dos límites que, no seu caso, se establezan con carácter xeral nas Leis de Orzamentos Xerais do Estado, e sen que podan destinarse ao pago de remuneracións de persoal de calquera tipo ao servizo da Corporación ou á adquisición de bens que podan constituír activos fixos de carácter patrimonial.

A o abeiro da normativa citada, propónse ao Pleno a adopción do seguinte ACORDO:

PRIMEIRO.- Dotar economicamente aos Grupos Políticos constituídos no Concello de Teo coas seguintes cantidades: 54 euros ao mes por Grupo Político, máis 107 euros ao mes por cada concelleira ou concelleiro integrante de cada Grupo.

SEGUNDO.- A dotación económica asignada aos Grupos Políticos non poderá destinarse ao pago de remuneracións de persoal de calquera tipo ao servizo da corporación ou á adquisición de bens que podan constituír activos fixos de carácter patrimonial.

TERCEIRO.- Os Grupos Políticos deberán levar unha contabilidade específica da dotación económica asignada polo Pleno con cargo aos Orzamentos anuais da Corporación, contabilidade que porán a disposición do citado Pleno sempre que este o solicite.

CUARTO.- Aprobar as seguintes bases reguladoras do destino e xustificación dos fondos aprobados por este Concello para dotar economicamente aos Grupos Políticos constituídos nesta Corporación:

BASES REGULADORAS

1ª).- **OBXECTO.** É obxecto das presentes bases a regulación do destino e xustificación dos fondos aprobados por este Concello para dotar economicamente aos grupos políticos constituídos nesta Corporación

2ª).- **CONTÍA.** A contía dos fondos destinados ascende a 54 euros ao mes por Grupo Político máis 107 euros ao mes por cada concelleira ou concelleiro integrante de cada Grupo, debendo consignarse no Orzamento anual da Corporación con suxeición aos criterios legais previstos no artigo 73 da Lei 7/85, de 2 de abril, artigo 214 do Real Decreto Lexislativo 2/2004, de 5 de marzo, polo que se aproba o Texto refundido da Lei Reguladora das Facendas Locais e demais normativa de aplicación.

3ª).- **INGRESO.** O ingreso dos fondos aprobados realizarase nunha conta bancaria cuxo titular será o grupo político municipal, debendo xustificarse a titularidade ante o Concello, presentando na Tesouraría municipal certificación de número de conta bancaria onde figure o nome e o CIF do grupo político municipal.

4ª).- **DEVENGO.** A dotación económica para os Grupos Políticos constituídos na Corporación devengarase dende o mes natural seguinte ao da súa constitución ata o mes de finalización do mandato, debendo consignarse no Orzamento anual a contía correspondente.

5ª).- **DESTINO.** O destino dos fondos asignados será a realización de actividades e servizos dentro do marco da súa función como grupo político dentro da Corporación para a xestión dos seus intereses e actuacións políticas con suxeición á legalidade vixente en todo momento e que non estea expresamente prohibido pola lexislación. A este respecto está expresamente prohibido o pago con ditos fondos de remuneracións de persoal de calquera tipo ao servizo da corporación ou á adquisición de bens que podan constituír activos fixos de carácter patrimonial.

6ª).- **XUSTIFICACIÓN.**

6.1.- **FORMA:** Os gastos realizados para os fins previstos no punto anterior

xustificaranse unicamente con factura ou facturas regulamentariamente expedidas a nome do grupo político municipal.

6.2.- PRAZO: A xustificación dos fondos verificarase unha vez ao ano ante o Pleno do Concello, dándose conta no primeiro pleno ordinario que se celebre a partires do mes de febreiro de cada ano, debendo os grupos políticos presentar no Concello a documentación xustificativa durante o mes de xaneiro de cada ano respecto dos gastos realizados no ano anterior vencido. No expediente de xustificación constará o informe de fiscalización da Intervención Municipal.

6.3.- EFECTOS: As cantidades non xustificadas do ano vencido sobre o importe da dotación económica concedida e aboada minorarán a dotación económica do ano seguinte na cantidade respectiva. Antes da data do fin do mandato todas as cantidades aboadas aos grupos deben estar xustificadas ou reintegradas.

7ª).- Nas bases de execución do Orzamento recollerase, no seu caso e a proposta da Intervención, a normativa complementaria ao acordo que agora se adopta.

QUINTO.- Publicar integramente este acordo no Boletín Oficial da Provincia e na páxina web municipal.”.

O sr. alcalde sinala que, mantendo o criterio que se mantivo en todas as propostas, se incrementan nun 7% as contías.

Preguntado polo sr. alcalde o portavoz do BNG, sr. Fernández, a portavoz do PSdeG-PSOE, sra. Lemus, e o portavoz do PP, sr. Guerra, non fan uso das súas quendas de intervención.

Sometido o asunto a votación, o Pleno da Corporación, con oito votos a favor (4 Son de Teo e 4 PSdeG-PSOE), sete en contra (7 PP) e dúas abstencións (2 BNG), acorda:

PRIMEIRO.- Dotar economicamente aos Grupos Políticos constituídos no Concello de Teo coas seguintes cantidades: 54 euros ao mes por Grupo Político, máis 107 euros ao mes por cada concelleira ou concelleiro integrante de cada Grupo.

SEGUNDO.- A dotación económica asignada aos Grupos Políticos non poderá destinarse ao pago de remuneracións de persoal de calquera tipo ao servizo da corporación ou á adquisición de bens que podan constituír activos fixos de carácter patrimonial.

TERCEIRO.- Os Grupos Políticos deberán levar unha contabilidade específica da dotación económica asignada polo Pleno con cargo aos Orzamentos anuais da Corporación, contabilidade que porán a disposición do citado Pleno sempre que este o solicite.

CUARTO.- Aprobar as seguintes bases reguladoras do destino e xustificación dos fondos aprobados por este Concello para dotar economicamente aos Grupos Políticos constituídos nesta Corporación:

BASES REGULADORAS

1ª).- OBXECTO. É obxecto das presentes bases a regulación do destino e xustificación dos fondos aprobados por este Concello para dotar economicamente aos grupos políticos constituídos nesta Corporación

2ª).- CONTÍA. A contía dos fondos destinados ascende a 54 euros ao mes por Grupo Político máis 107 euros ao mes por cada concelleira ou concelleiro integrante de cada Grupo, debendo consignarse no Orzamento anual da Corporación con suxeición aos criterios legais previstos no artigo 73 da Lei 7/85, de 2 de abril, artigo 214 do Real Decreto Lexislativo 2/2004, de 5 de marzo, polo que se aproba o Texto refundido da Lei Reguladora das Facendas Locais e demais normativa de aplicación.

3ª).- INGRESO. O ingreso dos fondos aprobados realizarase nunha conta bancaria cuxo titular será o grupo político municipal, debendo xustificarse a titularidade ante o Concello, presentando na Tesouraría municipal certificación de número de conta bancaria onde figure o nome e o CIF do grupo político municipal.

4ª).- DEVENGO. A dotación económica para os Grupos Políticos constituídos na Corporación devengarase dende o mes natural seguinte ao da súa constitución ata o mes de finalización do mandato, debendo consignarse no Orzamento anual a contía correspondente.

5ª).- DESTINO. O destino dos fondos asignados será a realización de actividades e servizos dentro do marco da súa función como grupo político dentro da Corporación para a xestión dos seus intereses e actuacións políticas con suxeición á legalidade vixente en todo momento e que non estea expresamente prohibido pola lexislación. A este respecto está expresamente prohibido o pago con ditos fondos de remuneracións de persoal de calquera tipo ao servizo da corporación ou á adquisición de bens que podan constituír activos fixos de carácter patrimonial.

6ª).-XUSTIFICACIÓN.

6.1.- FORMA: Os gastos realizados para os fins previstos no punto anterior xustificaranse unicamente con factura ou facturas regulamentariamente expedidas a nome do grupo político municipal.

6.2.- PRAZO: A xustificación dos fondos verificarase unha vez ao ano ante o Pleno do Concello, dándose conta no primeiro pleno ordinario que se celebre a partires do mes de febreiro de cada ano, debendo os grupos políticos presentar no Concello a documentación xustificativa durante o mes de xaneiro de cada ano respecto dos gastos realizados no ano anterior vencido. No expediente de xustificación constará o informe de fiscalización da Intervención Municipal.

6.3.- EFECTOS: As cantidades non xustificadas do ano vencido sobre o importe da dotación económica concedida e aboada minorarán a dotación económica do ano seguinte na cantidade respectiva. Antes da data do fin do mandato todas as cantidades aboadas aos grupos deben estar xustificadas ou reintegradas.

7ª).- Nas bases de execución do Orzamento recollerase, no seu caso e a proposta da Intervención, a normativa complementaria ao acordo que agora se adopta.

QUINTO.- Publicar integramente este acordo no Boletín Oficial da Provincia e na páxina web municipal.

E non habendo máis asuntos que tratar, sendo as vinte e unha horas, de orde da Presidencia, levántase a sesión, da que se estende a presente acta, do que eu, secretaria, dou fe.

O alcalde

A secretaria

Rafael C. Sisto Edreira

Virginia Fraga Díaz